

BN yakin tawan semula Hulu Langat pada PRU-13
Utusan Online
12 April, 2012

KUALA LUMPUR 11 April - Barisan Nasional (BN) Selangor yakin mampu menawan semula Parlimen Hulu Langat pada Pilihan Raya Umum Ke-13.

Pengarah Operasi Jentera Pilihan Rayanya, Datuk Seri Mohamad Zin Mohamed berkata, Parlimen itu merupakan antara keutamaan kepada BN dalam usaha mendapatkan semula Selangor.

"Kalau kita dapat (Parlimen Hulu Langat), saya yakin kita akan mengambil alih negeri ini daripada pembangkang.

"Sekiranya berjaya (tawan), nasib penduduk Hulu Langat akan kita bela. Kita bukan seperti pembangkang, sudah empat tahun mentadbir tetapi tidak memberi hasil atau manfaat," katanya ketika berucap pada majlis pelancaran Jentera Pilihan Raya BN peringkat Dewan Undangan Negeri (DUN) Kajang, di sini hari ini.

Menurut Mohamad Zin, dalam usaha ke arah itu setiap pemimpin komponen perlu bersatu padu dan memastikan tidak timbul isu sabotaj antara ahli serta parti.

"Momentum ada pada kita sekarang. Berdasarkan sambutan serta sokongan yang ditunjukkan oleh rakyat Selangor, kelebihan berada di pihak kita.

"Justeru, terus tingkatkan momentum ini dan jangan berundur atau melakukan sesuatu yang boleh melemahkan momentum ini," jelasnya.

Sementara itu, Mohamad Zin berkata, BN Selangor akan melancarkan Pusat Khidmat Rakyat minggu depan bagi membolehkan ahli dan pemimpin BN berhubung secara terus dengan rakyat.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0412&pub=Utusan_Malaysia&sec=Politik&pg=po_05.htm